

Tillaga að bókun sveitarstjórnar Dalabyggðar á 258. fundi vegna almannavarna- og löggæslumála:

Í umfjöllun um fyrirbyggjandi frumvarpsdrög vegna almannavarna segir að eitt meginmarkmið frumvarpsins sé að auka vægi fyrirbyggjandi aðgerða í þeim tilgangi að efla viðbúnað samfélagsins til þess að bregðast við áföllum. Unnt sé að draga verulega úr neikvæðum áhrifum óæskilegra atvika með því að auka áfallapol samfélagsins og þar skipti fyrirbyggjandi aðgerðir sköpum. Enda er markmið almannavarna að undirbúa, skipuleggja og gera ráðstafanir sem miða að því að koma í veg fyrir og takmarka, eftir því sem unnt er, að almenningur verði fyrir líkams- eða heilsutjóni eða umhverfi eða eignir verði fyrir tjóni, hvort sem það er af völdum náttúruhamfara, heilbrigðisvárs, netöryggisógnar, hernaðaraðgerða eða af öðrum ástæðum.

Í frumvarpsdrögum er áfallapol skilgreint sem geta kerfis eða samfélags til að forðast, draga úr eða yfirstíga hættuástand með fyrirbyggjandi aðgerðum og viðbrögðum. Að sama skapi eru ómissandi innviðir skilgreindir sem kerfi, eignir, aðstaða, búnaður, net, mannvirki eða þjónusta sem er nauðsynleg til að tryggja grunnþarfir samfélagsins og samfélagið getur ekki verið án í sólarhring eða lengur. Þeir geti verið í eigu eða á forræði opinberra aðila eða einkaaðila.

Þann 21. desember 2023 gaf ríkislögreglustjóri út skýrslu sem fjallar um löggæslu í Dalabyggð. Í skýrslunni segir að byggð og landfræðilegar forsendur í umdæmi lögreglustjórans á Vesturlandi kalli á staðsetningu lögreglustöðvar í Búðardal eða að Dalabyggð verði skilgreind sem sérstakt varðsvæði með eftirliti á sambærilegum tíma og lögreglustöð væri annars mönnuð. Dalabyggð er landfræðilega stórt sveitarfélag, það liggur á krossgötum þar sem meginæð þjóðvegakerfisins til Vestfjarða liggur um sveitarfélagið og þá má segja að jafnlangt sé til allra næstu þéttbýlisstaða eða ca. 80 km í Borgarnes, Stykkishólm, á Hvammstanga, Hólmavík og að Reykhólum.

Fram kemur í skýrslunni að markmið löggæsluáætlunar um viðbragðstíma og krafan um að almenningur njóti eftir því sem hægt er sambærilegrar þjónustu og öryggis hvar sem er á landinu kalli á viðveru lögreglu í Dalabyggð. Það sé einnig liður í að öryggisstig í umdæminu sé ásættanlegt. Náttúruvárs kalli einnig á að lögreglustöð sé til staðar í fámennum og landstórum byggðarlögum. Viðvera lögreglumanna á svæðinu sé liður í því að ná markmiðum um lágmarks viðbragðstíma hvað varðar neyðarútköll og lágmarks öryggisstig.

Það sé sama hvort rætt sé um lögreglustöð eða sérstakt skipulagt varðsvæði, hvortveggja kalli á álíka fjölda lögreglumanna og þó um sérstakt varðsvæði væri að ræða þyrfti lögreglan að hafa lágmarksaðstöðu á staðnum. Almennig hefur þær væntingar til lögreglu að hún sé fljót á vettvang þegar fólk er í neyð. Einnig að hún sinni fyrirbyggjandi löggæslu og ræki hlutverk sitt varðandi almannavarnir. Hvað varðar leit og björgun á landi og almannavarnir fer lögreglan með samhæfingarhlutverk viðbragða og oft reynir mjög á að lögreglan sé til staðar í dreifðum byggðum vegna margvíslegra ógna.

Þannig sé lágmarksmönnun að mati ríkislögreglustjóra fjórir til níu lögreglumenn í Dalabyggð og krafa um að til staðar sé aðstaða fyrir varðstofu, skýrslugerð, yfirheyrslur, starfsmannaaðstaða, bílageymsla fyrir lögreglubifreiðar og fangaklefi til skammtí mavistunar. Í dag hefur lögreglan aðeins til umráða 9,8 m² skrifstofu í Búðardal og í Dalabyggð starfar einn lögreglumaður í 50% starfi.

Sveitarstjórn Dalabyggðar skorar hér með á dómsmálaráðherra og aðra þá sem fara með málefni lögreglu og almannavarna að beita sér fyrir fjölgun lögreglumanna í Dalabyggð og að uppbygging húsnæðis viðbragðsaðila fari af stað sem allra fyrst þannig að m.a. lögreglu verði búin viðunandi starfsaðstaða í Dölum.